

**Zahid Mengalu-Alukan Anwar Bertanding Di Parlimen Bagan Datoh
Bernama
5 April, 2013**

BAGAN DATOH, 5 April (Bernama) -- Naib Presiden Umno Datuk Seri Dr Ahmad Zahid Hamidi mengalu-alukan Ketua Umum Parti Keadilan Rakyat (PKR) Datuk Seri Anwar Ibrahim bertanding di kerusi Parlimen Bagan Datoh pada pilihan raya umum ke-13 (PRU13).

Ahmad Zahid yang juga anggota Parlimen Bagan Datoh berkata sebelum ini, Anwar dikatakan akan bertanding di Ipoh Timur atau Gopeng dan terbaru Ketua Pembangkang itu dikatakan sedang memikirkan kemungkinan bertanding di Tambun atau Bagan Datoh.

"Saya amat-amat mengalu-alukan Datuk Seri Anwar untuk datang ke Bagan Datoh bagi menawarkan dirinya untuk bertanding atas tiket PKR kerana kerusi Bagan Datoh adalah kerusi yang ditandingi oleh PKR sebelum ini dan sebelum itu Semangat 46.

"Ini kampung saya, tempat saya dan kawan-kawan saya dibesarkan. Siapa saja mahu bertanding di Bagan Datoh saya persilakan. Saya bukan mahu riak atau takbur...datanglah," katanya kepada pemberita selepas menyampaikan input perikanan dan pertanian kawasan Parlimen Bagan Datoh di sini, Jumaat.

Beliau mengulas hasrat Anwar untuk tidak mempertahankan kerusi Parlimen Permatang Pauh dan bertanding di Perak.

Pada pilihan raya umum 2008, Ahmad Zahid mengalahkan calon PKR Madzi Hasan dengan majoriti 2,692 undi.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=939891>